

痘疹傳心錄

12-14

痘疹傳心錄卷之十二

國樵校

西吳朱惠明

著

婦人痘疹

婦人出痘治同小兒其所異者惟經行胎產而已蓋痘疹以氣血爲主若初發熱及痘生長時而經水應期而來應期而止是氣血循其度無足慮也其未及期而來又過期不止此乃熱迫其血血熱妄行過其常度治宜清熱解毒其血自止若初發熱生長之時經水及期而不行此雖不可輕動其血然亦宜防蓄血內攻當解血室之毒若痘正起發成漿經水及期

而來不止恐陰血虧損而陽氣虧弱不能充灌宜補托清熱爲主

蓋娠婦得氣血充足衝任榮和則胎得所如魚處淵若天行出痘恐熱毒侵損胞胎治宜清熱安胎以防墮落漏血也

又新產後而值出痘或痘生長而值產蓐其時瘀血未盡新血未足恐血虛不能任毒治當大補氣血故曰產後大補氣血如有他症以末治之此之謂也

附治驗

一婦人痘出經行余謂如期而來又痘形色來順不

治而愈有一如期不止余謂熱入血海以四物湯合導赤散愈

一婦人痘正出應期而來適斷乍寒乍熱譫妄昏潰余謂邪入血室與血相搏分爭而然也以升發解毒之劑愈

一痘正起發而經行不止余謂去血過多難治果伏陷而卒

一婦痘四朝非經期而月水適來不止余謂痘毒迫血而然以犀角地黃湯加紫草蟬蛻牛旁治之而愈
一婦人出痘非經期而月水適來聲瘖余謂曰心主

舌舌乃心之苗血去則心虛則少陰之脈不能榮於
舌以當歸麥冬生地人參甘草升麻燈心石菖蒲服
之而能言又十全大補湯愈
一婦素有崩漏之症而值出痘余謂氣血不足恐不
能任其毒以八物湯加續斷阿膠又補中益氣湯治
之愈亦有不應藥者伏陷而卒

一孕婦出痘余以安胎飲調理愈亦有痘出而胎痛
甚者以砂仁炒黑爲末每服一錢酒下愈

一娠婦痘正起發或養漿時而墮胎血去過多人事
昏潰伏陷而卒

又一婦症如前余以人參一兩黃芪一兩五錢甘草三錢當歸一兩阿膠五錢艾三錢黑姜三錢附子一錢水煎漸灌而甦

又婦痘正養漿而正產余謂痘順以保元湯加川芎當歸益母草山查荆芥治愈

一娠婦痘漿充足不易結疔面赤晡熱余謂脾虛血少以安胎飲加入參治之愈

一娠婦痘稀朗而色灰白熱盛而墮胎昏憤藥食卽嘔惟沸飲不嘔余謂胃氣虛寒以保元湯加炮姜白朮官桂治之愈

一產婦出痘不易透發熱盛煩躁狂言譫語余謂毒
盛壅遏以芎歸紫草黃連升麻蟬蛻甘草赤芍牛旁
治之愈

一產婦出痘隱隱不易透精神疲倦血去不止余謂
氣血兩虧以川芎當歸益母草炮姜人參升麻地榆
治之血止痘起又補中益氣湯愈

一產婦痘漿不足而色灰白身熱肢冷寒戰咬牙煩
渴溲泄余謂脾胃氣虛以異攻散治之愈亦有不應
藥者倒陷而卒

一產婦出痘雖稀朗去血不止倒靨而歿 又產後

去血不止伏陷而卒

一產後出痘形色雖順但痰涎壅盛醫以清解藥而痰愈盛余曰陰血虧損不能制陽火以六味地黄丸料加當歸麥冬治之愈

一婦新婚後出痘雖順而腰痛不已余謂陰血虧涸以八味地黄丸間服補中益氣湯愈

一婦痘愈而夫強以房事疤痕紫黑而歿又一婦痘後恣慾疤痕枯白漸爲勞瘵而卒

一凡孕婦出疹恐熱毒內蒸而胎受傷當以清熱安胎而兼解散之劑使胎無虞而疹易解也故曰疹與

痘不同痘宜內實若胎落而母亡疹宜內虛胎去而母存雖云胎去而母存孰若子母兩全之爲妙業是者當識此

一孕婦出疹熱甚而觸動其胎胎墮而去血過多疹雖沒而燥熱煩喘昏憤悶絕余謂血脫也當益其氣以理中湯而甦又以人參一兩當歸五錢阿膠炮姜荆芥艾葉又隨症調理愈

一孕婦出疹熱極煩悶醫以清熱安胎之劑而熱甚余謂心鑑曰凡孕婦發疹熱極不退者內實故也必下其胎胎下疹卽隨熱內解母命可存否則熱甚喘

脹子母難全不從余治如果而斃

一孕婦疹出熱盛小腹痛而漏血余謂熱盛觸動其胎以升麻葛根湯加荆芥紫蘇條芩當歸川芎阿膠白朮陳皮砂仁治之血止愈亦有不同前治胎墮而子母俱亡或子亡母存

一產婦疹不易出熱甚而去血不已余謂產後氣血不足不能拘毒盡外解以麻黃葛根湯加當歸阿膠荆芥白芷人參治之血止疹盡透調理而愈

一娠婦疹不易出熱極悶亂喘脹余謂疹勢危劇必不能兩全宜下其胎胎去而母存矣以表散而兼墮

胎藥其胎墮下疹透熱退而愈

一妊婦疹出熱盛墮胎而難產余以魚膠三寸燒灰存性麝香一分共研末好酒調下卽產若難之甚及橫生用魚膠一尺製如前法雖立產其子不能生矣一婦人疹後輕咳夜熱朝涼面白少神肌瘦唇赤咸謂氣血不足用八珍湯不效余審其疹後房勞不慎用六味地黃湯合生脉散又獨處百日愈又一婦疹後房勞不慎漸爲虛怯枯涸而斃

痘疹傳心錄卷之十二終

痘疹傳心錄卷之十三

痘疹傳心錄

西吳朱惠明

著

疹

一名痧子又名痲子又名醋子

夫疹亦胎毒也比痘稍輕然中有臟腑之分發因時

氣之擊

春溫夏熱秋涼冬寒此四時之正氣也冬宜寒而反溫則陽氣發洩太早至春必發疹也

故經曰冬居溫暖春必發疹

又曰少陽客勝則丹疹外發症分虛實之異治有補

瀉之殊然其症之發也類于傷寒寒熱頭疼目泪汪

汪鼻流清涕嘔吐泄瀉喘嗽噴嚏謔妄溺瀝飲食不

進煩躁悶亂睡臥不寧此因陽火攻擊以致毒乘于

脾熱流于心而干于肺蓋肺主皮毛脾主肌肉疹之

出賴二臟以行其毒惟利於發得透徹則毒盡出皮膚內熱自清則無患矣所以疹之出必咳嚏衄血嘔吐泄瀉也若其初發自頭而先見而至足爲齊頭面淡紅愈多爲佳其形若芥子細密其色若桃花紅活隱見二三番三四日漸沒人事安寧飲食如常二便清調此其順也若亢熱喘急發不能出或一出卽沒或冒風沒早或雖出而紫黑無神或淡白乾枯或身肢雖見而頭面不出及加喘脹胸高肩息狂言譫語或口鼻出血搦手搖頭尋衣摸牀飲食不進噦惡便秘口出屍氣此皆不治若喘嗽煩悶睡臥不安二便

堅閉飲食不進疹雖出而紫滯乃毒火熾盛治宜清
解爲主若疹雖透而色淡白乾咳不續減食便溏精
神疲倦乃中氣不足宜固中氣而兼清肺爲主一有
正氣不足不能逐邪外出致毒伏于內喘脹而死俗
名悶疹也間有風寒外襲閉其腠理或飲食停滯而
氣道窒塞以致疹不易出治宜疎利爲主論曰微汗
而邪無蓄便清而毒無壅且如腸胃結而疎利弗緩
腠理空而發散毋遲衄血而邪從衄解利下而毒以
利鬆咽喉腫痛降火爲急煩渴不已解毒爲先飲食
減常須救胃語言譫妄必清心時令冷兮投辛熱時

令涼兮用辛溫時令既溫辛涼無阻時方炎熱辛寒
可施故曰必先歲氣毋伐天和○然而爲治之要先
宜解散爲主解散則皮膚通暢腠理開豁則毒盡透
解則無餘邪之爲後灾若不知解散或藥悞溫寒或
坐視犯禁使邪不盡洩留蓄于中變症百出或煩躁
悶亂瀉利失血目赤口瘡不食便秘喉痛聲啞喘嗽
痰涎疔癰瘡腫等症見矣古人口治別虛實法宜變
通所謂活潑潑地是神術也

一今人以疹爲輕不能調護乃爲風寒外束及爲生
冷內傷鬱遏毒氣而不得外達欲出不出或一出卽

沒反毒內攻噬臍何及醫者亦以爲易治孟浪用藥而不知禁徃徃悞人不爲已咎也可痛可惜

一疹之出有中腑之正疹有風寒發疹有厲毒發疹有內傷發疹不可不辨然中腑之正疹者辛涼而發之風寒發疹者辛溫而汗之厲毒發疹者辛寒而清之內傷發疹者苦平而利之也

一凡疹之出雖先以發散爲貴若表實不易透或風寒壅遏者發解可也若表虛自汗疹毒易出而妄投之豈免虛虛之禍乎臨疹當辨虛實不同一治

一凡出疹首尾慎不可用燥悍之藥者蓋疹從肺始

肺屬金而西兌勝燥之方性勇悍而少柔喜清潤而

畏燥烈故曰疹要清涼投清涼則升用燥烈則瘧音

氣急也倘不得已而用麻黃桑皮等性燥之藥必蜜炒

再加性潤之藥佐之以折其悍氣則可矣若悞用之

則金愈燥烈譬猶滔天之焰復添以油豈有不斃之

理哉

一錢氏論疹要清涼以辛涼之藥發之當矣而味者

遂以清涼作寒涼看始出便用芩連梔膏等以涼其

邪熱眼見闐闐之中疹兒殞歿相繼者多矣蓋曰疹

者亦穢液之氣也伏藏于人身之中初無形臭必待

風寒時氣鼓擊而出則汗解之宜也辛散之宜也其
可以苦者堅之乎寒者束之乎經曰邪氣盛則實邪
既盛矣非汗散何由而解若以苦而堅其肌皮以寒
而束其毫腠則欲出未出之疹邪使之從何地而宣
泄乎乃致反戈內攻喘脹悶亂而死者多矣間有受
毒之輕感邪之淺或邪毒出于大半其暴烈之勢稍
衰者亦從而侵蝕于喉舌而爲瘡或留連于腸胃而
爲滯延綿日久使兒悴弱而斃者亦多矣凡用寒涼
但可施于君相之令炎夏之時疹盡出之後亦當中
病卽止若寒水之司嚴寒之令疹未盡出而投之則

火爲寒鬱豈能發越耶

附治驗

一小兒身熱喘嗽嘔吐不食余謂疹症也皆由風寒封閉腠理故伏而不出以麻黃葛根湯表之得汗則皮膚通暢疹透而症悉平矣亦有表之無汗不透或雖透卽沒反加喘脹不治

一兒身熱咳嗽疹出隱隱醫以疹藥發之不見不沒余謂癩疹也由客受風寒鬱而不散非若中腑之正疹也以芎蘇散治之愈

一女出疹藥用寒涼又食生梨一二疹卽殞沒喘急

胸滿面青肢冷眼合聲啞昏暈余謂毒爲寒鬱反毒
內攻而然也以麻黃湯加葛根紫蘇甘草桔梗生姜
服之外以被覆得汗而甦疹復出喘甚于前余謂驟
用麻黃燥烈之藥致毒火盛而肺氣熱也宜清潤之
以甘草桔梗牛旁前胡杏仁玄參知母天花粉黃芩
麥門冬治之喘息而愈

一兒身熱喘急腹脹醫云內傷外感治之不效召余
視其胸背隱隱赤色乃疹症也以麻黃葛根湯表之
疹雖見頭面不出卽沒而死

一兒身熱喘脹人事不甦口鼻出血面色青白乾枯

余謂悶疹不治

一兒身熱疹出吐瀉余謂初出疹而吐瀉者乃陽火得洩吉兆也以升麻葛根湯表之疹盡透而愈亦有兼傷食吐利者前方加消化之藥

一兒身熱頭疼骨痛

傷寒症

咳嗽氣急

疹症也

噉惡不食

余謂傷寒而兼疹發以百解散十神解毒湯治之症平疹透愈 亦有症類如前醫緩治之疹雖透而色

紫黑喘脹悶亂不治

一兒疹半出壯熱喘脹煩躁悶亂余謂疹不盡透邪毒內攻而然也以麻黃甘草桔梗乾葛荆芥前胡枳

克牛蒡治之疹盡出二三番漸沒而愈

一兒疹不易透喘脹昏潰余謂客冒風寒致毒鬱而不易出以桂枝湯加麻黃葛根前胡服之又以防風煎湯一盆置病人牀下熏之厚衾汗出疹毒盡透而愈或以芫荽防風湯浴洗頭面手足爲妙又以苧蘇蘸芫荽酒遍身戛之愈妙

一兒汗出疹透喘急不止余謂邪氣壅盛以炒黑麻黃杏仁甘草石膏治愈

一兒疹出色紫便秘溺赤煩躁悶亂余謂疹毒亢盛以大柴胡湯利行三次前症悉平愈

一兒疹出彌盛形如錦紋而間有頭粒色赤壯熱煩躁舌胎便秘余謂癰疹並行以調胃承氣湯利之又白虎湯合葛根湯治之愈

一兒疹出紫色喘嗽瀉不食余謂疹毒亢盛以解毒飲挑痧法愈

一兒疹盡出客冒風寒沒早喘脹不治亦有急用麻黃桂枝湯而疹復見愈

一兒元月發疹身肢隱見不振而頭面不出面色青白喘脹悶亂右寸脉微余謂正氣虛不能逐邪上升於頭面宜補益而助升發爲主以麻黃桂枝湯加人

參二錢水煎服又以芫荇防風煎湯浴洗頭面手足
疹透症平而愈

一兒疹出色紫便秘溺赤煩躁悶亂余謂疹毒亢盛
以大柴胡湯愈

一兒疹正出而恣食停滯腹飽便秘壯熱譫語余謂
食壅而毒不化以大黃枳實瓜蒌仁厚朴甘草黃連
利之而尚喘嗽壯熱脈遲肢冷以附子理中湯又歸
芍六君子湯治之愈

一兒疹雖盡出而喘脹便秘壯熱譫語余謂毒壅不
盡出以黃連枳實瓜蒌仁桑白皮地骨皮知母石膏

人中黃治之愈

一兒出疹悞與酸醋聞之聲啞不清終身痼疾
一君相司天之歲時行發疹凡治以清涼發解之劑
無有不愈若以燥悍藥發之多有壞亂也經曰必先
歲氣毋伐天和正此謂也

一兒疹不易出余以二仁膏服之疹卽盡出而愈

一兒疹出腹飽便秘余謂內傷發疹以承氣湯下之
愈

一兒疹出紫色沒早喘急不嗽通關不噎口張眉聳
胸高如龜舌乾唇燥搖頭搦手面枯青白余謂邪火

熾盛而肺竅窒塞不通不治也故曰喘而咳嗽者可療喘而不嗽者難醫

一兒疹雖出而咽喉滄水舌胎唇燥余謂毒留心胃以黃連解毒湯加連翹牛蒡治之愈

一兒疹出身熱咳嗽不止余謂餘毒乘金以清金化毒湯愈

一兒出疹汗出喘甚余謂仲景曰喘而大熱者內熱甚也以麻黃杏仁石膏治之愈

一兒夏月出疹不易透無汗而喘以麻黃湯加知母石膏黃芩治之愈

一兒夏月出疹身熱頭疼喘嗽無汗余謂風寒壅閉
腠理以升麻葛根湯加羌活白芷荆芥桔梗前胡知
母治之汗出疹盡透而但身熱以香茹飲而合化癍
湯愈

一兒夏月出疹熱甚煩渴余謂疹兼暑毒以香茹飲
合葛根湯治之愈

一兒痘後出疹衆謂痘後正氣未復以補兼升發之
劑喘急而爲悶疹不治

一男子身熱喘嗽醫以退熱止嗽之劑身涼喘甚而
咽痛余謂疹症藥悞寒涼毒爲寒鬱而疹不出也以

麻黃桂枝湯加乾葛治之冷汗微出疹透而愈

一兒疹邪不盡身熱喘嗽聲瘖余以甘桔牛蒡湯加蘇子前胡桑皮杏仁連翹治之愈○又一兒症亦如前余以甘桔牛蒡湯加杏仁知母玄參前胡天花粉麥門冬淡竹葉治之愈

一兒疹後身熱余以涼膈散治之愈

一兒疹後乾咳不續余謂醫過發散致肺氣虛耗以小異攻散加門冬五味子貝母桔梗治之愈

一兒疹後乾咳便溏減食余謂中氣虧耗宜溫補之以六君子湯治之愈

一兒疹後身熱不已午後猶甚余謂疹出之後陰分曾受煎熬血必虧耗乃血虛症也治當滋陰清火此養陰退陽之義也

一兒疹後咽喉腫痛余謂餘毒不解以甘桔湯加牛蒡射干玄參連翹知母治之又葛槿散吹之而愈

一兒疹後身熱煩渴不已余謂虛煩以竹葉石膏湯去半夏加乾葛花粉治愈

一兒疹後痰嗽口疳身熱腹飽余謂補益太早以清胃湯加腹皮枳殼治愈

一兒疹毒不盡口齩潰爛乾咳不已余謂毒乘心胃

以人參清胃湯治之又人中白散吹之愈亦有不應藥者唇腫面浮穿頤潰齧咽喉腐爛聲啞不食而死一兒疹後衄血不止余以茅花煎濃汁服之愈或用茅根亦可

一兒疹後壯熱咳嗽痰血余謂毒留肺胃以黃連黃芩山梔知母花粉玄參人中黃愈

一兒疹後壯熱煩渴利下鮮血不止以白頭翁湯治之愈

一兒疹後利下膿血裏急後重余謂毒入大腸先以三黃丸利之次黃連芍藥湯治之愈

一兒疹後滯下不止飲食少進脉緩肢冷余謂脾胃氣虛用理中湯又歸芍六君子湯治之愈。亦有不應藥者或噤口而死或殮泄而死

一兒疹後壯熱羸瘦煩躁悶瞀余謂邪不盡解而乘心肝治以清解之劑愈亦有不應藥者漸皮毛枯槁成爲疔瘵津液枯涸而卒

一兒疹後壯熱乾咳煩渴便秘余謂疹邪不解以三黃湯利之又以知母門冬前胡玄參黃連當歸天花粉淡竹葉治之熱雖退而咳渴不止余謂肺氣受傷而津液不足以參苓門冬五味貝母陳皮甘草桔梗

花粉知母治之漸愈。一兒症亦如前但熱不退漸至肌肉消瘦面色枯白嘔惡泄利余謂疹後疔勞不治延至六旬而歿

一兒疹後乾咳便溏身熱羸瘦皮毛枯悴余謂疹後疔瘵之症以小異功散加貝母黃連地骨皮青蒿龍膽草芍藥治之漸愈。亦有不應藥漸爲慢脾風而死

一子新婚出疹後痰嗽不已衆謂餘毒不盡用清解藥而痰愈熾余謂陰虧而火炎無制故午後潮熱而咳甚也治宜壯水爲主以六味地黃丸料加麥冬知

癩癧傳心金 卷十三
母治之愈。又一婦出疹症亦如前。余以前方加當歸治之愈。

一兒疹後兩目赤腫壯熱煩渴。余謂毒不盡解。乘於肝胃。以清胃解毒湯治之。愈。每有延綿失治。或瞽或瞎。

一兒疹後瘡癩遍體。壯熱煩躁。余謂疹毒不盡。先以葛根湯加荆防發之。又犀角地黃湯治之愈。

一兒疹後走馬牙疳。齲潰穿鼻。諸藥不效。余以黃牯牛糞後尖瓦上煨存性。爲末。人中白煨爲末。黃栢爲末。等分。和勻吹之。潰竅漸長。齲齒俱生。而愈。

一兒疹邪不盡發爲疔余謂痧疔也治同痘疔又一
兒疹毒不解發爲癰腫余謂痧癰也治同痘癰

一兒疹後乾咳不已余謂疹時過於解散肺氣虛耗
宜補脾肺爲主不信只以清火止咳藥其背漸跂腿
足細小終身痼疾亦有嗽久而胸高腫滿狀如龜胸
啓雲先生曰疹後久嗽則金衰金衰不能生腎水腎
主骨髓腎無生氣則骨枯而髓減風寒乘虛而入於
髓其邪凝滯故腰脊不舉而爲斯疾也治法先以防
風散驅其邪又八味地黃丸加人參杜仲牛膝當歸
石斛何首烏米仁兔絲子萆薢鹿茸蜜丸又以驅風

壯筋活血膏貼其凸處又灸肺俞穴

第三堆骨下各開一寸半膈

俞穴

第七堆骨下各開一寸半

一兒患此余診右脉緩弱謂脾肺

不足先以人參白朮茯苓陳皮甘草貝母當歸芍藥

米仁石斛水煎服脾土稍固又以前方法治之腿足

漸而生肉背跖稍愈但不能脫然如故

蓋疹後當避風寒節飲食以保脾土爲上若有虛實

爲之補瀉不可因循苟且以致變壞也其雞肉葷鮮

鹹酸辛辣宜過七七期方漸與食故曰雞肉早殮豈

免脾遺之患鹹酸不禁難免哮喘之病一或不慎終

身痼疾爲父母者當加謹焉

水痘

蓋水痘由紅點而水疱有紅盤水疱而膿疱結疔但其形歪斜非正瘡痘也然小兒肌肉嫩薄尤多此症皆由傷風寒熱邪鬱於肌表不能作汗而解發爲水痘也當審其稀密輕重而治之初起時宜升發之爲水疱宜解散之膿成宜斂之亦有夾疹而出有夾正痘而出不可不辨

附治驗

一兒水痘不易生長壯熱煩躁以百解散得微汗愈
一兒出水痘不作漿而疔結乾枯身熱煩躁余謂倒

陷也皆由風寒壅窒腠理失于解散故也以葛根湯加荆防翹蛻木通治之腫退遍身紅點余謂餘毒發疹用荆防解毒湯愈

一兒夏月出水痘稠密間多黑陷煩渴便秘壯熱余謂熱毒太甚以三黃丸利之又香茹飲合黃連解毒湯治之愈

一兒水痘結疔於上齦潰齒穿鼻余謂痘時失於解散毒乘陽明以清胃湯合解毒湯愈

一兒水痘失於解散痘或膿瘡不斂余以綿繭散敷之又收斂解毒之劑愈

發癍

癍者班如錦紋紅色而無頭粒也乃熱毒鬱遏煎熬陰血血得熱而不解浮於肌肉爲癍足陽明主之活人書曰傷寒下之太早熱氣乘虛入胃故發癍下之太遲熱留胃中亦發癍陽症用熱藥過多胃熱焦爛亦發癍有內傷胃氣極虛火遊行於外亦發癍也癍色紅活者順赤癍者熱毒盛也青癍黑癍者逆也治法清解爲上不可表汗若汗之重令開洩更增班爛也病機曰癍疹固有陰陽輕重皆從火化急則治標緩則治本陽症可清熱化癍陰候宜調中溫胃

附治驗

一兒發癍余以荆防敗毒散治之愈又發癍咽痛加牛蒡連翹元參愈

一兒發癍赤色煩躁便秘溺澀余謂熱毒壅盛以黑奴丸微利之愈

一兒發癍身熱口舌乾燥余以化癍湯加小柴胡黃連治之愈

一兒發癍赤色腹脹痛便秘余謂內傷發癍以調胃承氣湯下之身冷脈沉肢厥以附子理中湯六君子湯量而用之

一兒夏月發癩余謂暑毒發斑以化斑湯合香茹飲治之愈

一兒發癩嘔吐利下目赤口瘡余以黃連橘皮湯治之愈

一發癩狂煩面赤咽痛余以梔子仁湯治之愈

一夏月發癩咽痛余謂毒壅咽喉以升麻玄參甘桔牛蒡治之愈

一兒夏月發斑疹熱盛狂煩余謂溫毒發癩以五瘟丹治之愈或用黃連陳皮湯治之愈

一兒發癩身熱頭疼咳嗽余謂風熱發癩以芎蘇散

又葛根湯治之愈

一兒發癍赤色余謂胎毒發癍以犀角解毒湯治之又砭出紫血愈亦有毒氣內攻喘脹而卒

一兒發癍丹色余謂胎毒而發以磁針刺血以犀角大青湯治之漸退解愈

一兒痘後發癍紫色身熱便秘余審病原順候醫妄用溫補藥致毒蓄而然也以四順清涼飲利下又解毒化癍之劑而愈

痘疹傳心錄卷之十三終

痘疹傳心錄卷之十四

西吳朱惠明

西吳朱惠明

著

諸藥性口訣

人參益元陽而生津液黃耆補衛氣而實腠理所補
既有差殊其劑豈可等分補中益氣當以人參加重
爲君實表護榮須讓黃耆倍用爲妙甘草生分身稍
而瀉火炙健脾胃而和中當歸通血脈而補陰虛君
枳殼以潤燥堅白朮益脾治濕而生津液瀉痢水泡
者勿加茯苓養智滲濕而止渴毒不解而瀉者宜用
川芎引清陽而達表勿缺於痘漿未滿之先芍藥斂

陰氣以助陽每用於痘漿既充之後橘紅消痰而理
氣陳皮益胃而和中蟬蛻取輕清以疎肌竅木通散
鬱火以利膀胱紅花有養血活血之功生地有涼血
行血之効若痘乾紅便加紫草滑肌通竅毒壅堪行
惟實熱賴之爲有益倘虛寒誤用以便澀食停不化
宜用山查善逼瘡痛能消積聚行滯氣於補益方中
解鬱結於透肌湯內荆芥通血脈散諸邪而清頭目
連翹清客熱消氣聚而治血凝枯梗利咽喉而清氣
道能發散而善開提腹皮分清濁而利小便消痘毒
而去膨脹牡丹皮清血中之毒壯熱繁紅爲聖藥地

骨皮去骨蒸之熱毛焦皮燥是良材官桂祛風邪而實腠理和榮衛以固肌表丁香治嘔逆而助元陽煖腰膝而除冷痛木香運氣理脾虛泄瀉方中必用乾葛療肌退胃熱渴煩湯內須加犀角黃連解蘊毒惟熱盛則前後堪行麥門五味定心煩有渴症則始終宜入天花粉消痰清胃有潤燥生津之功訶黎勒開胃澀腸有收斂降火之効白芷疎風解利排膿而消痘毒紫蘇流氣發散表邪而治風寒至羌活有運毒走表之長防風有發散逐邪之妙薏苡利腸消渴開胃進食如神枳殼平胸快膈下氣寬中最速開腠定

喘於麻黃壅遏憑之而發散平胃溫中於厚朴腹脹
用是以消磨山藥補虛損能消腫硬匾荳清暑氣而
治泄瀉粘米陳倉助漿益胃猪苓澤瀉分利陰陽淡
竹葉涼心火而退虛煩石膏瀉胃熱以消煩渴桑
皮去火邪而鑿喘嗽杏仁潤肺氣以治痰涎枸杞子
添精固髓壯筋骨以滋陰山茱萸溫肝補腎煖腰膝
而興陽枳榔破滯氣能治後重草菓消宿食以除脹
滿酸棗仁寧心益智史君子治疴殺蟲乾薑溫中氣
而止嘔逆是以胃虛而寒泄者宜用則用大黃蕩腸
胃而潤燥堅是以熱壅而便秘者當加則加鼠粘清

利咽喉透肌解毒升麻升發元陽堪散瘡瘍前胡解
肌安表蒼朮進食寬中止嗽開痰於貝母清便降火
於山梔黑附子回元氣而療虛寒成扶危救急之功
龍腦片涼心血而起黑陷有撥亂反正之力麝香通
竅於毫毛能治驚悸雄黃解毒於臟腑兼可消痰硃
砂鎮心定志而有養血活血之能珍珠透裡入堅而
解骨中髓中之毒牛膝益陰壯陽填骨髓而除腰膝
痠痛遠志助陽強志定心氣而增智慧安神杜仲能
益腎而添精破故療腰膝而止痛薄荷能清六陽之
煩熱利關節而治風涎天麻療風熱而除驚悸通血

脉以開肌竅神麴破癥結以逐痰麥芽化宿食而消
穀霍香治嘔逆而溫中肉果溫脾胃而止瀉人牙齒
善攻腎中之邪穿山甲能發經絡之毒知母滋陰補
腎散下焦之火邪燈心利竅通陰治小便之淋閉冠
血桑蟲俱和酒漿而發痘生薑大棗發表助胃以和
中玄參治痰熱而散無根之火烏藥消脹滿以順心
胸之氣車前子專入膀胱而利水道金銀花善療癰
疽誠爲要藥菊花能明目而清頭腦青皮利肝氣而
消痞結鼈甲消癩癖而治瘡母常山截溫瘧以吐痰
沫三稜散積聚而消滯氣蓬莪治瘀血以破癥瘕黃

藥瀉伏火而補腎陰不足黃芩治痰喘而瀉肺熱有
餘天門冬補肺而消痰鈍嗽白芫慈散冷而行滯溫
脾利竅除煩於滑石消痰降膈以南星石斛補虛羸
治胃中虛火香茹利小便消暑熱除煩瞿麥通小便
之隆閉射干治喉痺之痰涎龍膽草除伏火而消目
腫胡黃連療骨蒸而治疔癆消疔殺蟲無如蘆薈利
濕毆疽須用茵陳香附米能開鬱以寬中阿膠珠善
養肝而補血半夏止痰飲而開結氣砂仁消宿食理
氣燥脾謹撫述平和之要品以爲治病增減之良規

藥性主治

人參味甘氣溫氣味俱輕升也陽也入手足太陰滋
補元陽能除虛熱若補上焦元氣而清脾胃肺中之
火升麻爲引補下焦元氣而瀉少陰腎中之邪茯苓
爲使君黃耆能斂虛勞之盜汗臣天麥可補不足之
元神東垣曰人參黃耆甘草退虛火聖藥也大抵主
補五臟不足生津液止渴古云諸痛不可用參朮此
指暴病氣實者而言也

擇堅實明熟者佳去蘆可用

黃耆味甘氣微溫氣薄味厚可升可降陰中陽也入
手少陽手足太陰溫分肉而充皮膚肥腠理以司開

闔無汗則發有汗則斂排膿止痛長肉生肌內托之
聖藥也性畏防風得之其功愈大蓋相畏而相使也
東垣曰人參惟補元氣調中黃耆兼補衛氣而實表
也

擇直如箭幹柔軟類綿肉白皮微黃者佳用治
瘡家蜜炙補虛損酒炙治痘不起發如手足痘
不起以桂枝煎酒浸過炙用

甘草味甘氣平生寒炙溫可升可降陰中陽也入足
太陰少陰厥陰生分身稍而瀉火消毒炙健脾胃而
和中養血因其性緩能解諸毒故熱藥用之緩其熱

寒藥用之緩其寒中滿症恐甘能作脹勿用下焦藥
因性緩難達少加

當歸味甘辛氣溫氣味俱輕可升可降陽也入手少
陰足太陰厥陰經頭止血而不走身和血而中守尾
破血而下流同參耆能補血同牽黃能破血從桂附
則熱從硝黃則寒能使氣血各有所歸故名當歸性
潤滑下大便溏泄而痘脚塌者須忌

東正釋肥軟內白者去蘆酒洗晒乾行表洗片焙乾
有痰薑汁漬晒乾頭痛酒蒸晒乾痘血熱用尾
血虛用頭身

白朮味苦甘辛氣溫味厚氣薄可升可降陽中陰也
入心脾胃三焦除濕益燥緩脾生津補虛勞內傷健
脾胃進食益氣和中止瀉利便或問白朮既燥何以
能生津曰脾惡濕脾濕勝則氣不得施化津液何由
生也故曰膀胱津液之腑氣化出焉用白朮燥其濕
則氣得周流而津液亦隨氣化而生矣又問曰白朮
何能生膿曰白朮能閉氣氣閉則生膿也若痘乾枯
血熱者且須忌之

擇堅白者去皮止洩土炒痂不易脫桂湯浸晒

乾用調脾胃人乳潤之

茯苓味甘淡氣平屬金降也陽中陰也白者入膀胱
腎肺生津益氣止瀉利溺赤者入心脾小腸瀉利專
主茯苓善補心氣安神定悸經曰茯苓能滲濕又謂
生膿義同白朮

川芎味辛氣溫氣厚味薄浮而升陽也手少陽本經
之藥又入肝命門佐升麻升提氣血上行頭目下行
血海通肝經血中之氣藥也散肝風開鬱行氣毆脇
痛除結消癰凡頭面痘不起發者用之表虛者勿入
蓋辛能發散也血熱者少用蓋辛能耗血也
芍藥味苦酸氣平微寒氣薄味厚可升可降陰中之

陽也入脾肺二經白者抑肝緩中固腠理而止瀉痢
除寒熱而治腹疼與白朮同用補脾與參耆同用益
氣血散不歸賴以斂之而附氣漿足不斂賴以收之
而成功赤者利小便去熱消癰經云冬月減芍藥以
避中寒也

赤者生用白者酒浸透切片晒乾炒用補陰酒
浸日晒用如痘瘁塌四肢不起發者以桂煎酒
浸炒用

陳皮味辛苦氣溫氣薄味厚浮而升陽也導滯氣止
嘔治咳理脾胃消食和中君白朮益脾佐甘草補肺

去白者理肺氣而降痰涎也

擇陳久者佳去筋膜切晒止吐以東壁土炒用
蟬蛻味甘氣寒凡痘疹出不快或倒陷者用之表虛
者勿加

擇完者以溫酒洗淨用去目中翳膜去翅足用
止天弔怔忡用蟬花

木通味甘淡氣平味薄陽也陽中陰也瀉小腸火鬱
不散利膀胱水閉不行

擇小內微黃者去皮小便白利勿用痘後發癰
毒者用節酒浸透晒乾用

紅花味甘苦辛氣溫陰中之陽多用則破血少用則入心養血與當歸同功

宜酒浸晒乾入藥如痘不易出及黑陷者用子以酒浸晒炒研用

生地黃味甘苦氣寒氣薄味厚沉而降陰也入小腸心涼心火血熱瀉脾土濕熱熟地黄微溫入心肝命門腎大補血衰倍滋腎水

擇肥大生於懷慶皮有疙瘩者佳勿犯鐵器如上達或行表酒浸晒用有痰薑汁炒

紫草味苦氣寒利九竅而通水道痘疹不易出者用

之大便滑利者勿加

山查味甘酸氣溫平陰中之陽也化食積能消滯血
行結氣健脾發痘過用虛內

擇色紅肉厚者蒸熟去核晒乾用

荆芥味辛苦氣溫氣味俱薄浮而升陽也上行發表
能清頭目辟邪氣而通血脈破結聚而散瘡疔

擇花實成穗者去土用凡痘出發不快者用之

止血酒炒黑用

連翹味苦氣平微寒氣味俱薄可升可降陽也入手
少陰心手足少陽陽明瀉心經客熱降脾胃濕熱散

諸經血凝氣聚治癰腫癩毒瘡疽

去梗酒浸晒乾研細用

桔梗味辛苦氣微溫味厚氣輕陽中陰也入肺膽二
經治鼻塞咽喉腫痛逐肺熱止嗽下痰排膿養血開
提榮衛同甘草爲舟楫之劑

擇堅實肥白者去頭切片以米泔浸一宿晒乾
用

大腹皮味辛氣微溫下膈氣消浮腫

先以酒浸去濁仍以大豆汁洗之晒用

牡丹皮味辛苦氣寒陰中微陽入腎包絡散冷熱血

氣涼骨蒸止吐衄血熱痘瘡用爲涼血解毒也

擇肉厚者去心用

地骨皮味苦氣寒陰也入腎三焦去肌熱骨蒸治五
內邪熱同牡丹皮解除肌熱

擇肉厚者水洗去骨晒乾用

官桂味辛甘氣熱氣味俱薄體輕而上行浮而升陽
也入足太陽膀胱通榮衛而開腠理和氣血以散風
寒如痘不起發不光壯者用之參耆藉其力而達表
四肢痘發不透者宜此引經惟妊婦出痘不可用以
桂能墮胎故也如內虛腹痛者用之若發表用桂枝

也

丁香味辛氣溫純陽入手太陰肺足陽明胃足少陰經治脾胃之嘔逆治心腹之冷痛凡痘瘡泄瀉脾胃虛寒者可用寒戰咬牙足冷者與桂同用

木香味辛苦氣溫味厚於氣降也陰中陽也和脾胃散肺中滯氣逐積年冷氣止瀉痢與補藥爲佐則補與瀉藥爲佐則瀉痘家非瀉痢者勿用

擇形如枯骨枯口粘牙者佳勿見火實大腸火

煨用

乾葛味甘氣平寒氣味俱薄體輕上行浮而微降陽

中陰也入足陽明發表解肌生津止渴升提胃氣善除胃熱而療渴煩也

擇白淨多粉者削去皮用

犀角味苦酸鹹一云辛甘氣寒入陽明能解煩熱之溫疫善療瘡腫之癰疽鎮肝明目安心定神凡痘血熱者用之血虛者勿加

擇角尖黑色肌龕皺光潤者佳用宜水磨

黃連味苦氣寒味厚氣薄可升可降沉也陰也陰中微陽入手少陰心鎮肝涼血止煩渴而除驚悸解熱毒而厚腸胃如初病氣實熱盛者可用如久病氣虛

發熱者服之反助其火也

擇肥大堅實者去鬚切以酒浸晒乾炒用瀉陳
壁土炒痘後日痛人乳浸蒸夏月生用冬月官
桂煎浸晒炒

麥門冬味甘微苦氣平微寒降也陽中微陰入手太
陰肺手少陰心治肺伏火邪補心勞傷損除煩解渴
益精強陰退虛熱客邪毆心肺燥咳

擇肥大者去心用不令人煩

五味子味酸氣溫味厚氣輕降也陽中微陰入手太
陰肺足少陰腎生津止渴益氣強陰毆煩熱補元陽

收耗散之金滋不足之水凡痘家咳嗽者用之

擇肥大潤澤者去梗洒洗晒乾搗碎則五味具
天花粉味苦氣寒味厚陰也潤心中枯渴降膈上熱
痰排膿消腫長肉生肌

擇白者去皮搗爛以糯米泔水攪開攄取粉陰
乾用

訶黎勒味苦酸氣溫苦重酸輕性急降也陰也開胃
澀腸而止瀉痢噉痰住嗽以治膨脝因味酸苦而有
收斂降火之能也

擇六稜黑色肉厚者火煨去核用

白芷味辛氣溫氣味俱輕升也陽也通行手足陽明
又爲手太陰之引使去肺經風寒療心腹血痛排膿
消毒長肉生肌

紫蘇味辛甘氣微溫解肌發表開胃下食梗下諸氣
子破痰喘潤心肺止咳而降氣也

羌活味苦甘辛氣平微溫氣味俱輕浮而升陽也紫
色節密者爲羌活肺與膀胱引經之藥又入足少陰
厥陰黃色成塊者爲獨活入足少陰腎俱透關節散
肌表之邪利百節之痛

防風味甘辛氣溫升也陽也主太陽經藥通行脾胃

乃卒伍卑賤之職隨所引而至者也治上焦風邪瀉
肺實有餘如痘作痒者蜜煮與黃耆同用如手足痘
不起發者酒洗與芍桂同加痘濕不易收者用之風
能勝濕也

薏苡仁味甘氣微寒無毒專療濕痺筋急拘攣消水
腫利腸胃主渴除煩開胃進食

枳殼味苦酸辛氣微寒氣厚味薄浮而升微降陰中
陽也主胸膈痞塞寬大腸結氣除脹滿而利關節破
痰癖以消積聚

擇陳久不蛀者以水去穰麩炒熟用

麻黃味甘辛氣溫氣味俱薄輕清而浮升也陽也入
手太陰肺又手陽明榮衛之藥散風寒解疫癘泄衛
實而消癰疹去榮寒而除身熱乃發汗解表之聖藥
也

擇陳久者去根節沸湯泡三次晒乾剉又以蜜
酒各半浸良久再晒炒焦色用凡痘出遲及黑
陷倒靨者用之

厚朴味苦辛氣溫氣味俱厚體重濁而漸降陰中陽
也下氣消痰溫中益氣治腹痛消脹滿凡痘家腹脹
者用之

擇肉厚紫色者去皮以生薑自然汁塗慢火上炙令透剉用

山藥味甘氣溫平入手太陰肺足太陰脾主諸虛百損五勞七傷長肌肉強筋骨除煩熱消腫硬益氣調中之聖藥也

白扁豆味甘氣微溫主下氣和中治霍亂吐逆消暑止瀉之藥也

糯米味甘氣溫主動正氣而足漿戀膈難化充飡不宜

陳倉米味甘鹹酸氣溫調和脾胃止洩瀉解煩渴取

多年倉中香黃者炒熟煮湯能潤喉燥

猪苓味甘苦淡氣平氣味俱薄升而微降陽也入足
太陽少陰通淋消腫滿除濕利水道大能燥亡津液
倘無濕症勿輕用之

澤瀉味甘鹹氣寒氣味俱厚沉而降陰也入足經太
陽少陽除濕止渴聖藥通淋利水仙丹

淡竹葉味甘淡氣平寒陰中微陽專涼心經除煩止
渴一種草類專利小便竹茹退熱善除嘔逆竹筍發
氣能托痘瘡

白石膏味辛甘微寒氣味俱薄體重而沉降也陰中

陽也入手太陰肺足陽明胃手少陽三焦生津止渴
瀉胃火解肌表

擇白者火煨研末用

桑根白皮味甘辛氣寒可升可降陽中陰也入手太
陰瀉肺中火邪除喘嗽唾血解渴消痰

擇白者去外皮剉以蜜水浸透晒乾如此三次
炒黃色用

杏仁味甘苦氣溫可升可降陰中陽也入手太陰肺
除胸中氣逆喘促止咳嗽逐痰潤燥

擇去雙仁去皮尖炒黃色研用如泥

枸杞子味苦甘氣微寒明目安神補勞傷消渴添精
固髓健筋骨滋陰

山茱萸味酸澁氣平微溫無毒入足厥陰肝足少陰
腎補肝腎而興陽道益精髓以煖腰膝

檳榔味辛苦氣溫氣薄味厚沉而降陰中陽也逐水
穀能治痰癖破滯氣以除後重

草果味辛氣溫升也陽也消宿食除脹滿去邪氣卻
冷痛惟專消導大耗元氣老弱虛羸者少用

酸棗仁味酸氣平無毒益肝而寧心志補內以斂虛
汗毆煩止渴五臟能安

取淨仁如生用治多眠膽實有熱炒熱用治不眠膽虛有寒也

史君子味甘氣溫除疝殺蟲止瀉禁痢

用火微煨去殼用

乾姜味辛氣大熱氣味俱厚半沉半浮可升可降陽中陰也止吐瀉理中除臟腑沉寒

溫水洗浸火炙令胖用

大黃味苦氣大寒氣味俱厚沉而降陰也入手足陽明蕩滌腸胃通利水穀瀉實熱利燥結凡痘家大便不通腹脹煩躁者用之

擇堅實錦紋者酒浸蒸晒乾用

鼠粘子味辛苦氣平退風熱痰壅咽喉不利透毒解毒痘家之聖藥也

以酒淘去沙土去浮者不用晒乾瓦器炒研用之

升麻味苦甘氣平微寒氣味俱薄浮而升陽也足太陰陽明引經藥凡補脾胃必此引之敗皮膚之風熱散肌肉之客邪引葱白散手陽明之風邪引石膏足陽明之齟痛若元氣不足陽氣下陷者用此升提上行如痘出遲起發不易者酒洗用之

前胡味苦氣平微寒氣味俱輕升也陽也治結氣而消癥滿毆痰實以療風寒

蒼朮味苦甘辛氣溫味厚氣薄可升可降陰中陽也入足陽明太陽寬中進食健胃安脾消痰結燥脾濕如瘧濕痒不易斂者用之

擇堅實中白者去皮剉以粘米泔浸透晒乾取東壁土炒黃色用

貝母味辛苦氣平微寒入手太陰肺主咳嗽消痰散心中逆氣

山梔子味苦氣寒味厚氣浮微降陰中陽也入手太

陰而瀉肺火解熱鬱而行結氣其性屈曲下行大能
降火從小便中泄去有云利小便者實非利小便乃
清肺也肺氣清而化則小便從此氣化而出經曰膀胱
爲津液之腑氣化出焉此之謂也

擇七稜鮮紅者去內熱用仁酒浸晒乾炒焦色
如去肌表熱和皮用亦酒制如解鬱火薑汁製
如止血炒黑

黑附子味辛甘氣大熱浮也陽中之陽也除四肢厥
逆去五臟沉寒補陽氣不足能引導諸經凡助甘緩
參著成功健潤滯地黃建効痘內虛泄瀉四肢厥冷

寒戰咬牙及灰白瘁塌者用之

擇頂平正圓一兩一枚者先以童便浸過紙包
慢火中炮極熟去皮臍切片再用防風甘草煎
湯乘熱浸過晒乾用

龍腦片卽冰片味辛苦氣溫微寒

痘家心煩狂躁妄語者取爲細末猪心血丸如
雞豆大每用一丸紫草葺湯送下

麝香味辛氣溫鎮心安神而除驚悸通關利竅以善
催生故痘家用之於人牙獨聖散內

雄黃味苦辛甘氣平寒治瘡瘍辟邪鬼

硃砂味甘氣微寒主鎮養心神通調血脈

珍珠氣寒鎮心安神治小兒驚熱風癇

牛膝味苦酸氣平益陰壯陽而除腰膝痠痛小便短少以治手足寒痺

擇肥大者酒洗用

遠志味苦氣溫益精氣而壯元陽安心神而增智慧去骨取皮甘草湯浸一宿晒乾用

杜仲味辛甘氣平溫氣味俱薄降也陽也補中強志益腎添精腰痛者神功足疼者立効

取厚潤者去皮剉薑汁潤透炒去絲

破故紙味苦辛氣大溫主氣血勞傷治腰膝痠痛固
精髓興陽道

用鹽酒浸一宿蒸過晒乾

薄荷味辛苦氣溫氣味俱薄浮而升陽也入手太陰
厥陰主下氣而消脹滿發汗而通關節清六陽會首
毆諸熱風痰治小兒風涎壯熱能引藥入於榮衛

天麻味辛苦氣平治小兒風疳驚悸療大人風熱頭
眩毆濕痺拘攣利腰膝強筋

神麴味甘氣平入足陽明胃經下氣調中消食止瀉
破癥結逐痰積

大麥蘖味鹹溫化食消痰虛者少用防消腎水
藿香味苦甘氣微溫味薄氣厚可升可降陽也入手
足太陰助脾開胃快氣溫中止嘔吐理霍亂

揀去枝梗用

肉苳蔻味苦辛氣溫入手陽明大腸理脾胃虛寒止
內虛瀉痢

麩包煨熟用

人牙齒屬腎能發腎毒托痘

求小兒落者燒存性爲末加麝香少許用

穿山甲氣微寒能穿經絡于榮分凡瘡痘伏陷備此

引導諸藥若誤用之反耗氣血也

用酒浸以陳壁土炒令黃色用

知母味苦辛氣寒氣味俱厚沉而降陰也入足少陰陽明手太陰肺經療骨蒸而除痰咳消浮腫善解渴煩補腎水瀉無根火邪之聖藥也

入腎鹽炒入肺酒炒

燈心味甘氣寒主通陰竅利小便

雞冠血至清至高用之發痘取發陽之意也

桑蛀虫用之發痘亦取發陽之始也

酒漿味甘辛氣溫養脾益肝榮肌膚通血脉厚腸胃

行藥勢能走諸經凡治痘用解毒藥以酒浸洗炒者
可以通行一身之表也

生薑味辛氣微溫氣味俱輕陽也佐大棗益氣厚腸
益脾胃豁痰利竅溫經而散寒邪驅熱而除嘔吐

大棗味甘氣平溫氣厚陽也養脾胃益氣潤心肺生
津助諸經補五臟

玄參味苦鹹氣微寒入足經少陰明目補腎益精強
陰散無根浮遊之火療瘰癧寒熱往來

烏藥味辛氣溫氣厚於味陽也入足少陰陽明治諸
冷氣消食積作脹攻婦人滯凝血氣去小兒積聚蛔

虫

車前子味甘鹹氣寒入足太陽厥陰通淋澀利水道
忍冬花卽金銀花味甘氣溫善治癰疽未成則散甚
多拔毒之功已成則潰大有回生之力

菊花味甘苦氣平寒可升可降陰中陽也清頭腦而
養目去翳膜而治煩熱

青皮味甘辛氣寒氣味俱厚沉而降陰也入手少陽
三焦足厥陰肝散滯氣而疎肝削堅癖而消積凡痘
家用之瀉肝而不作痒也

擇陳久者水浸去穢剉曬乾用

鱉甲味鹹氣平散癖痞除勞瘦骨蒸治瘰癧驅往來
寒熱

擇九肋生剔者以醋漬一週時文火炙脆入石
相杵細若治勞熱童便浸

常山味苦辛氣寒截瘧瘧吐痰沫

擇如雞骨者以酒漿浸晒乾炒用以折其悍性
也

三稜味苦辛氣平消癥瘕除積聚

麩包火炮剉醋炒用

蓬朮味苦辛氣溫破瘀血而消積止心痛以通經

依前炮製

黃蘗味苦微辛氣寒氣味俱厚沉而降陰也足太陽少陰經藥降相火而瀉膀胱除骨蒸以滋陰腎

補虛蜜製降火酒製

黃芩味苦氣平大寒味薄氣厚可升可降陰也入手太陰瀉肺火消痰利氣酒炒上行子芩入手陽明瀉大腸火養陰退陽生用最妙得白朮砂仁安胎之聖藥也

天門冬味苦甘氣平大寒氣薄味厚沉也陰也入手太陰肺足少陰腎補虛勞強骨髓能瀉肺火消痰住

嗽保脾氣吐衄妄行虛熱人正宜虛寒人勿服

白苳蔻味辛氣大溫味薄氣厚陽也入手太陰肺散
冷滯益元陽溫脾却痛消積寬膨

滑石味甘氣寒性沉重降也陰也入足太陽膀胱利
九竅而行六腑解煩渴以實大腸補脾泄降妄火

擇白者研細水飛過用如痘潰爛用此敷之

南星味苦辛氣平可升可降陰中陽也乃肺經本藥
利胸膈下氣而化稠痰也

用生薑湯炮過七次剉晒用

石斛味甘氣平補虛羸而長肌肉壯筋骨而健脚膝

皮外邪熱堪逐胃中虛熱能除

用酒浸蒸過用

香菇味辛氣微溫治傷暑而除煩解熱利小便而調

胃溫中如夏月出痘不可缺者清暑故也

瞿麥味苦辛氣寒降也陽中微陰利小便決癰腫去

枝梗取實用

射干味苦氣平微溫陰中陽也治太陰之積痰驅喉

痺之咽痛

切片以甘草水浸晒乾用

龍膽草味苦澁氣大寒氣味俱厚沉而降陰也益肝

膽而治胃中伏熱卻驚癇能除目內翳膜

去蘆酒洗浸晒乾用

胡黃連味苦氣平寒療勞熱骨蒸治久痢成疳補肝
膽以刮目疼理腰腎而斂陰汗

蘆薈味苦氣寒殺疔虫鎮心明目理小兒驚搐顛癇
茵陳味苦辛氣平微寒陰中微陽入足太陽專治痘
症解傷寒能驅熱煩如夏月出痘熱甚而小便不利
者用之

香附米味苦甘氣微寒氣厚於味陽中陰也開鬱而
快氣逐瘀血以調經

用童便浸透炒如理氣疼醋炒用

阿膠氣甘辛氣平微溫味薄氣厚升也陽也入手太陽足厥陰少陰治肺虛久欬止吐衄崩帶煎氣養血之聖藥也

剉薄片蛤粉和炒成珠入劑不煎研末調化

半夏味辛苦氣平生寒熟溫沉而降陰中陽也入足陽明胃足太陽脾足少陽膽化痰止吐而有燥濕益脾之妙

用沸湯泡過七次仍加薑製

砂仁氣溫味辛苦溫脾胃下氣消宿食止痛

用宜炒礮爲末

硃砂氣味甘微寒安魂魄治驚癇解胎毒痘毒

石菖蒲味辛苦氣溫開心竅出聲音益智手足濕痺可使伸屈

生石澗中一寸九節者方靈忌見鐵

肉苁蓉味甘酸鹹氣微溫治男子絕陽不興洩精遺溺療女人絕陰不產崩中帶下助相火補益勞傷煖腰膝堅強筋骨

擇鮮大者佳酒浸刷去浮甲酒蒸忌鐵器

兔絲子味辛甘氣平堅強筋骨補髓添精夢遺精泄

腰膝冷痛

水洗去沙酒漬杵爛捏成餅晒乾爲末

何首烏味甘苦氣微溫長筋骨而益氣血久服添精
令人有子痘瘡血虛者用

擇赤白相兼大者佳竹刀刮去皮米泔浸一宿

晒乾木杵搗碎黑豆浸汁拌豆上九蒸九晒

胡麻味甘氣平補虛羸填腦髓堅筋骨益氣力長肌
膚明目輕身延年不老

用麻布包白酒內洗去沙用舊荷葉上蒸熟搗
碎晒乾如此數次磨爲末如炒則油出難磨矣

女貞實

即冬青樹子

味苦甘氣平補中氣而安五臟養精

神堅強筋力

冬至日收酒浸一宿晒乾研碎

益母草味辛甘氣微溫調胎產而行瘀血生新血以去死胎

端午日收陰乾忌見鐵

地膚子味甘鹹氣寒專利水道去熱膀胱多服益精強陰痘初出而小便赤澁者用之

川續斷味苦辛氣微溫續筋骨以調血脈消腫毒而

生肌肉

擇粗根節節斷皮黃皺者佳酒浸一宿晒乾

益智味辛氣溫和中氣治脾胃寒邪禁遺精併小便遺溺止嘔噦以攝涎唾調氣血而理三焦

五加皮味辛苦氣溫微寒健步堅強筋骨能毆常痛風痺

漢防己味辛苦氣平寒平也治腰已下至足濕熱腫痛利大小二便退熱膀胱消腫散毒之効

秦艸味苦辛氣平微溫入手陽明大腸養血榮筋治風痺肢節疼痛

藁本味辛苦氣溫風濕通用止頭痛於巔頂散寒邪

於巨陽

沙參味甘氣微寒治諸毒排膿消腫安五臟補肺益肝

苦參味苦氣寒治熱痢下血腸風療溫病狂言心躁丹參味苦氣微寒生新血能散惡血安生胎而落死胎調經脉而止崩帶消積聚而破癥墜

白蘚皮味苦鹹氣寒治黃疸濕痺手足不能伸屈一切癩毒風瘡

玄胡索味辛苦氣溫入太陰脾肺又走肝經調月水而氣血凝滯治產後瘀血攻冲小腹脹痛

地榆味苦甘酸氣微寒治婦人崩中帶下月水不
斷又止瀉痢腸風諸血熱者可用虛寒瀉痢者忌之

百合味甘氣平養臟智而安心膽消浮腫而治痰

蒸食補中益氣

百部味甘苦氣微寒治肺熱咳嗽傳尸骨蒸

去心酒浸焙乾

旋覆花味甘鹹氣溫治頭痛明目止寒熱痰涎

川葶藶味苦甘氣平治風寒濕痺筋骨疼痛近道所

產喚爲冷飯團治楊梅瘡劑內用也

芫花味辛苦氣溫治水腫發浮消胸膈痰沫

用醋煮數沸水浸一宿晒乾

鈎藤味甘苦氣微寒專理幼科寒熱驚癇手足搐搦胎風客忤

澤蘭味苦甘氣微溫治胎產百病消遍體虛浮

葶藶子味辛苦氣大寒治肺喘降痰涎逐膀胱伏熱消面目虛浮

擇甜者佳隔紙文火畧炒

吳茱萸味辛苦氣溫大熱主咽嗑寒氣散胸隔冷氣
歐脾胃停寒逐膀胱濕氣

用湯泡七次焙乾研碎

琥珀味甘氣平利水道而通五淋定魂魄以安五臟

用青布包敲碎再研細

枇杷葉味苦氣平除肺熱咳嗽治嘔噦渴煩

用麤布刷去毛姜汁浸炙微黃治咳蜜炙

桃仁味苦甘氣平苦重於甘入足厥陰肝潤大腸血燥便難小腹血凝成塊逐瘀血止痛生新血通經蓋苦以破滯氣甘能生新血也

用湯泡去皮尖雙仁者不用研如泥爛

蔓荊子味苦辛甘氣溫微寒止頭疼明目利竅通關

用文火炒研去衣

五倍子味苦酸氣平禁瀉痢腸虛卻頑痰退熱

炒黑染烏鬚髮煎湯頻洗眼目

巴豆味辛氣溫生溫熟寒去胃中寒積急攻通利去
皮心膜油生用緩治消積炒令烟盡黃黑熟佳

蘇木味甘鹹氣平專行積血通經立除產後敗血外
科跌撲死血

沉香味辛氣微溫補相火養諸氣
乾漆味辛鹹氣溫能追積殺虫消瘀血止痛

得真者文火炒

白蕪荑味辛氣平殺虫化食

擇氣腥者火炒

雷丸味苦鹹氣寒解胃熱而消蟲積

牙皂味辛鹹氣溫搗鼻噴嚏利關通竅 皂刺治潰

瘍直達潰處成功 大皂莢燒灰存性治積

決明子味酸苦甘氣平微寒除肝熱止目疼治頭痛

止鼻衄搗碎用

蒺藜子味苦辛氣溫微寒療雙目赤疼除喉痺頭痛

婦人癥結積聚男子遺溺泄精

通草味淡氣平專利小腸利水通竅

擇潔白輕虛者佳

青箱子

卽白野
花子

味苦氣平微寒多治眼科去肝熱

退心火暴發赤障

木賊味甘微苦益肝膽退目翳

用手搯節淨

茅根味甘氣寒利小便止吐衄除客熱解煩渴花止血

艾葉氣味苦微溫生寒熟溫入四物湯安胎漏腹痛
調經開鬱溫煖子宮

牽牛子味苦氣寒治壅滯氣急利大小二便水腫虛

浮

用黑者勝炒研取頭末

蘆根味甘氣寒退熱除煩開胃下食

取土內者佳如露出及浮水者不宜用

小麥芽味甘氣溫能消宿食除膨脹文火炒用

白芥子味辛氣溫能消痰癖古云痰在脇下非白芥

子不能達

炒研用

萊菔子下氣而除咳喘炒研用

青礞石墜痰消積

火煨研末

羚羊角味苦鹹氣寒毆肝肺邪熱治搐搦驚癇
虎脛骨味辛氣微熱堅強筋骨而治下體痛風

擇大者有力鋸片酥炙脆研末用

牛黃味苦氣平能安神魄治小兒驚癇客忤口禁不
開療大人顛狂發瘧痰壅不語

僵蚕味辛鹹氣平治小兒驚癇夜啼醫婦人崩中帶
下赤白拔痘毒散喉痺

擇直白者佳炒斷絲用蚕退蚕大眠起所脫皮也燒灰存

性敷牙疳口瘡益婦人崩帶痢疾下血腸風

五靈脂味甘氣平通經閉治心腹冷痛

酒淘去沙石行血宜生止血宜炒

全蠲味甘辛治小兒風癩手足抽掣毆大人中風口
眼喎斜能消癩癬

洗去泥土新瓦上焙乾研末

紫河車味甘氣大溫治諸虛百損勞瘵傳尸五勞七
傷骨蒸潮熱

取壯盛婦人首生男胎者佳用米泔浸洗再以
白酒洗淨文火炙乾用

朴硝味苦辛鹹氣寒潤燥糞推陳致新消癰腫排膿
散毒 芒硝消痰癰通經滌腸胃明目 硝石味辛

能潤燥鹹能軟堅苦能瀉實也但力較前二硝畧少
緩耳 風化硝取輕而不降易化頑痰 玄明粉緩
而又緩治虛熱虛痰

屋遊 味鹹氣寒利水膀胱治虛浮在皮膚間

取老屋上青苔曬乾能退面上痘瘡浮遊之火
烏飯樹葉 味苦氣平悅顏色耐老堅筋骨健步久
服輕身不饑髮白變黑

南人以四月八日取汁漬米甚黑炊飯甘美

川椒味辛氣溫大熱卻心腹冷痛消水腫黃疸退兩
目翳膜而煖腰膝也 椒目味苦兼辛行水而治水

腫定痰喘劫藥斂盜汗捷方宜炒研未調服

製須炒出汗去目并黃殼閉口者不用

馬兜鈴味苦氣寒微炒燥劫痰喘去肺熱止咳

紫苑味苦辛氣溫主咳逆痰喘肺痿吐膿治小兒驚

癇

水洗去頭浸宿焙用

楮實子味甘氣寒治水腫壯筋骨補虛勞益氣力酒

浸週時晒乾用

漏蘆 味苦鹹氣寒下乳汁止遺溺

槿樹花味苦氣平主瀉痢腸風澁腸止血 又一種

白槿花解毒治喉風

粟米新則味鹹陳則味苦氣平微寒北方曰春爲糧
呼曰小米養腎補脾卻胃熱大解消渴更實大腸
蜜糖味甘氣平微寒益氣補中潤腸治燥更補五臟
不足

取川白者佳文武火煉熟用

飴糖味甘苦氣微溫和脾潤肺止渴消痰小兒多食
損齒生蟲

欵冬花味辛甘氣溫止咳嗽潤肺治肺癰膿血腥臭
甘草湯浸一宿曬乾用

果部

荔枝味甘微酸氣溫升也陽也主散無形質滯氣止渴歐寒

殼燒能解穢氣

龍眼味甘氣平益脾胃養肌肉美顏色卻怔忡

榧子味甘屬土與金健筋骨調榮衛多啖引火入肺大腸受損

白果味甘苦主動風作痰治白濁小兒食之多發驚搖

胡桃味甘氣溫主補下元多食動風生痰助腎火

栗子味鹹氣溫熟食滯氣生食發氣晒乾食下氣

主健腰足厚賜胃

梨子味甘微酸氣寒止嗽消痰去客熱毆煩渴

柿子味甘氣寒潤心肺止嗽消痰解渴 乾柿氣平

厚腸胃益中

枇杷味甘酸潤五內多食發熱發痰

葡萄味甘酸氣平主逐水氣利小便善發痘疹

蓮肉味甘澁氣平寒生食動氣蒸食養神主益諸經

血氣安君相火邪禁精洩清心去腰痛止痢 石蓮

子惟清心

藕味甘氣寒治瘀血止吐衄煮熟實下焦開胃脘
雞苳實味甘氣平補中氣益精止腰膝疼痛

甘蔗味甘氣平助脾氣和中利二便止渴

沙糖殺瘡虫潤肺涼心除寒熱

烏梅味酸氣平收斂肺氣解渴除煩

橄欖味酸甘性溫生津開胃解酒及魚毒 核煨灰

治口瘡

榛子味甘性平益氣力寬大腸亦充腸臟

松子味甘性溫平疎風潤臟益志和中

梧桐子味甘性平益脾胃動風氣

石榴味甘酸性平生津解渴食多損肺

楊梅味酸甘性溫少食生津解酒多食熱遺腸胃亦

發宿食

櫻桃味甘微酸性溫能益脾胃多食令人作熱 核

煎湯發痧

李子味甘微酸苦性溫多食遺熱于腸胃令人瀉痢

能發痼疾

桃子味甘微酸苦性溫熟食充饑過食令人腸滿作

瀉

杏子味甘酸性溫多食傷筋骨損脾胃

林檎

即花紅

味甘微酸澀性溫止瀉痢多食發熱滯氣

發痰生瘡

葶藶味甘性平益脾胃消宿食化積滯

茨菰味苦甘性微寒生用清熱解渴熟用和中益氣

活血易產有冷氣者勿用

菱角味甘性平益腸臟亦可充饑多食令人脹滿

無花果味甘性平益脾胃止洩痢

芋菽味辛甘性微寒有小毒益腸胃亦可充饑過食

令人氣滯脹悶有冷氣者勿用

黃荳味甘性溫平益腸胃充飲食去濕痺癢痛解附

子毒利氣

菘苳味甘性微寒解砒毒醒酒清胃熱涼脾 粉敷

丹毒充五臟涼腸胃 芽味甘性平寒清腸胃之熱

赤苳味甘性平利小水消腫滿益脾氣

蚕苳味甘性平益胃充饑多食滯氣

虹苳味甘性平益胃和中

刀苳味甘苦性微寒多食損脾

苳腐味甘性平潤腸臟澤肌膚活血脈通乳汁 油

潤腸解毒

蘿蔔味辛甘性溫下氣除膨利痰定喘消麩食

冬瓜味甘性微寒養脾胃除煩渴利大小便治小腹
脹久病滑泄者少用

胡荽味辛性溫溫中消谷能通竅治痘疹不易出

葱味辛性溫發寒邪之汗可止頭痛能通上下之陽
開竅利氣

蒜味辛性溫有小毒下氣消食敷癰腫殺虫辟穢惡
生痰久食損目

韭味辛性溫理氣和中 汁止吐衄消瘀血治淋利

水漬湯可洗脫肛

甜瓜味甘性微寒少用止渴利水多食致膨作瀉菜

瓜同

西瓜味甘性微寒解暑渴煩悶利小便

王瓜味甘平性微寒解煩渴滑大腸多食損脾令人瀉利小兒多食生虫積

絲瓜味甘性寒平解痘毒癰瘡利痰降火多食滑腸令人泄瀉

瓠子味甘苦性微寒有小毒利水道消浮腫清熱

茄子味甘平性寒多食動氣能發痼疾胃寒人食之作嘔瀉

莧菜味甘性微寒利大小便清熱益氣久食明目

馬齒莧味甘微酸性微寒止瀉痢治腸痛敷腫毒久食消翳明目燒灰存性敷口疔瘡

芥菜味辛性溫開胃利氣發瘡瘍子理氣開脾

白菜味甘平性平益脾胃充腸臟

油菜味甘平性平清腸胃利大小便

苣菜味甘性平利腸胃清煩熱解魚腥

茭白味甘性微寒清臟腑熱利小便糟用甚美

紫菜味甘性微寒消癭瘤結氣解煩熱食多令人腹

痛

木耳味甘平性寒平清血熱崩漏帶下去腸中積熱

痔瘡

石花味甘性平寒清胸膈火利腸胃熱之藥下痰

蘇菰味甘微苦性微寒清腸胃熱益脾和中

淡菜味甘鹹氣微寒和肺氣益腎氣

蛤蜊肉性冷煮食潤五臟止消渴開胃殊功

蘄菜味苦平氣寒主女子赤白帶止血益精保血脈

和中增飲食健胃三月八月忌食

菱蕤甘平補中益氣除煩渴治風淫濕毒目痛背爛

疔瘡莖寒自汗一切不足之症

紫菀辛溫潤肺苦溫下氣補虛調中消痰止渴治寒

熱結氣肺經虛熱小兒驚癇

柴胡苦平微寒味薄氣升為陽主陽氣下陷能引清

氣上行而平少陽厥陰之邪熱為足少陽表藥治小

兒痘疹五疳羸熱

篇蓄苦平殺虫疥利小便治黃疸熱淋虻咬腹痛虫

蝕下部

草豆蔻

一名辛熱香散煖胃健脾破氣開鬱燥濕祛

寒除痰化食

薑黃苦辛色黃入脾兼入肝經理血中之氣下氣破

血除風消腫治風寒濕痺

鬱金辛苦氣寒純陰之品具性輕揚上行入心及包絡兼入肺經涼心熱散肝鬱下氣破血治婦人經脉逆行小兒痘毒入心

商陸苦寒有毒沉陰下行治水腫脹滿

大戟苦寒有毒能瀉藏府水濕行血發汗利二便

蓖麻子辛甘有毒性善收亦善走能開通諸竅經絡利水氣治胞胎不下追膿拔毒

巴戟天甘辛微溫入腎經血分強陰益精治五勞七傷散風濕脚氣水腫

大小薊甘溫皆能破血下氣行而帶補大薊兼治吐

衄腸癰

夏枯草苦辛寒無毒入肝經辛能散結苦能泄熱獨走厥陰明目治癰

瑣陽甘溫補陰益精興陽潤燥養筋治陽痿滑大腸淫羊藿辛香甘溫入肝腎補命門益精氣堅筋骨利小便治絕陽不興絕陰不產冷風勞氣四肢不仁

覆盆子甘酸微溫益腎藏而固精補肝虛而明目起陽痿縮小便

骨碎補苦溫補腎治耳鳴又入厥陰心包肝能破血止血

蒲黃甘平厥陰血分藥生則性滑行血消瘀通經利小便炒黑性瀉止一切血崩精泄

海藻鹹潤下而軟堅寒行水以泄熱消結核堅聚昆布功同海藻而少滑性雄治水腫

威靈仙辛泄氣鹹泄水其性善走能宣疎五藏治中風頑痺積聚黃疸大小腸秘一切冷痛

水萍辛散輕浮入肺經能發揚邪汗治一切風濕癰瘰

豨薟苦辛生寒熱溫治肝腎風氣四肢麻痺陰血不足者忌服

青蒿苦寒入少陽厥陰血分治骨蒸勞熱久瘧久痢
瘡疥

高良薑味辛溫無毒入脾胃肝三經溫胃止噎治心
腹痛

海金沙甘寒淡滲治小腸膀胱血分溫熱及腫滿五
淋

穀精草味辛溫輕浮上行陽明胃兼入厥陰肝能明
目退翳 兔糞名望月砂兔喜食此草故目疾家收
之

王不留行甘苦而平其性行而不住通血脈乃陽明

衝任之藥通經利便下乳催生

山慈茹甘微辛有小毒清熱散結治癰瘡疔腫癰核
甘遂苦寒有毒能瀉腎經及隧道水濕主治大腹腫
滿痰迷癩癩麪裹煨熟用

貫衆味苦微寒有毒而能解邪熱之毒治崩中帶下
產後氣脹痛破癥瘕發癰疽

山豆根苦寒瀉心火以保金氣去肺與大腸之風熱
消腫止痛腹痛下痢五痔諸瘡

白芨味苦而辛性濇而收入肺止吐血肺損者能復
生之治跌打折骨惡瘡癰腫去腐逐瘀

蛇床子辛苦而溫強湯益陰補腎散寒祛風燥濕治
婦人子藏虛寒產門不閉炒熱熨之
黃精平甘補中益氣安五臟益脾胃潤心肺填精髓
助筋骨除風濕以其得坤之精粹久服不饑
阿魏辛平入脾胃消肉積去臭氣解葦菜諸毒治心
腹冷痛
栝子仁辛甘而潤其氣清香能透心腎而悅脾助脾
滋肝益血止汗治風濕驚癇
側柏葉苦瀋微寒養陰滋肺而燥土最清血分爲補
陰要藥治吐衄崩淋

槐花苦涼入肝大腸血分而涼血治風熱陽虛

辛夷辛溫無毒入肺胃氣分解肌通竅利關節治鼻淵鼻塞風熱諸病火盛者忌服去心去毛用

桑寄生苦甘益血堅腎治安胎崩漏散瘡瘍追風濕
蕤仁甘溫入心肝脾三經消風散熱益水生光治目赤腫痛心腹邪熱

檀香辛溫調脾肺利胸膈去邪惡爲理氣要藥
降香辛溫辟惡氣治傷折止血定痛消腫生肌

蘇合香甘溫通竅開鬱

乳香香竄入心苦溫補腎活血調氣托裏護心生肌

止痛治心腹諸痛

沒藥苦平散結氣通滯血消腫定痛生肌治金瘡惡

瘡

安息香辛苦性平入心經行血下氣去鬼來神

血竭甘鹹入血分補心包肝血不足散瘀生新爲和

血之聖藥治內傷血聚金瘡折跌止痛生肌

枳殼苦酸微寒破氣行痰止喘消痞寬腸胃氣虛人

忌用

茶葉甘苦微寒入心肺二經消食下痰止渴利小便

治頭疼

天竺黃甘微寒利竅豁痰鎮肝明目治中風小兒驚
癇

竹葉辛淡甘寒除上焦風邪煩熱咳逆喘促嘔噦吐
血治小兒驚癇○竹茹甘寒止嘔清熱○竹瀝甘寒
潤燥行痰利竅明目笋尖發痘瘡

蜜蒙花甘平入肝經養營利血退翳開光治痘疔攻
眼

胡椒味辛大熱有毒入胃大腸二經下氣溫中消風
去痰

木鼈子甘溫有毒散血熱除癰毒止腰痛生肌肉但

宜外用勿輕內服

水楊苦平止久痢而多功浴痘瘡而起發卽忍冬藤也春冬用枝秋夏用枝葉生水邊細葉紅梗枝上有圓果滿果有白鬚散出今醫家用水楊樹根則誤矣
樗白皮味苦澁寒有小毒瀉血止瀉痢殺虫收產腸
○椿白皮主用相微力稍遜

郁李仁酸平入脾大腸二經性專澤下善導大腸燥結利周身水氣乃治標救急之藥慎勿輕用
沒石子苦温入腎經益血生精強陰治痿助陽事止遺淋

木瓜酸溫入肝經舒筋急利筋緩兼攻濕痺尤療脚氣

香櫞苦溫入肺脾二經理氣止嘔寬中健脾

麻仁甘平入脾胃二經潤五藏通大腸利關節治難產

麻油味甘微寒熟者利大腸下胞衣生者摩瘡腫生禿髮

黑豆甘平入腎經活血散風除熱解毒消水腫稀痘

瘡

淡豆豉味甘苦寒入肺脾二經解肌發汗下氣清煩

治寒熱溫癰瘡痢

穀芽味甘苦溫其生化之性故能消食健脾和中開

胃

醋酸溫入肝經破癥積塗癰疽消心腹之疼殺魚肉

之毒

瓜蒂苦寒有小毒入胃經治水停食積極苦而性上

湧故能吐而去上焦之病

金箔辛平有毒鎮心辟惡○銀箔功用相倣

自然銅辛平續筋接骨消痰破滯

銅青辛酸女科理血氣之痛眼科主風熱之疼內科

吐風痰之聚外科止金瘡之血殺虫有效疔證亦宜
黃丹辛寒止痛生肌鎮心安魄下痰殺虫截瘡止痢
蜜陀僧辛平有小毒鎮心主治五痔金瘡瘡痢

紫石英甘温而補入心肝血分主心神不安肝血不
足不孕者宜之

赤石脂酸辛大温入心胃大腸三經收濕止血固下
治癰瘍崩漏脫肛腸澀

爐甘石甘温止血消腫收濕除爛退赤去翳爲目疾

要藥

鍾乳石甘濕有毒益精止嗽解渴通百節利九竅

陽起石鹹溫入腎經固精而壯元陽益氣而止崩帶
磁石辛鹹入腎經補腎益精除煩祛熱通耳明目治
驚癇腫核止金瘡血

食鹽鹹甘辛寒入腎經通二便鹹走血而寒勝熱故
治目赤癰腫血熱兼治心虛骨病齒痛痰飲喘逆結
核積聚解毒殺虫定痛止癢多食傷肺凡血病哮喘
水腫消渴人大忌

蓬砂味苦辛寒入肺經除上焦胸膈之痰熱治喉痺
口齒諸痛噎膈積塊努肉目翳

硫黃味酸有毒大熱純陽補命門真火不足性雖熱

而疎利大腸治寒痺冷癖小兒慢驚殺虫療瘡

白礬酸鹹而寒性瀉而收燥濕追涎化痰墜渴解毒
生津除風殺虫止血定痛通二便蝕惡肉生好肉除
骨髓痼熱治驚癇黃疸血喉痺齒痛崩帶脫肛疔腫
癰疽多服損心肺傷骨○煨乾汁卽名枯礬

伏龍肝辛溫主崩中帶下尿血遺精去濕是其專長
墨辛溫止血消癰

百草霜辛溫清咽治痰解熱定血

髮苦溫去痰補陰吐血衄紅腸風崩帶○乳甘平大

補真陰最清煩熱○津唾甘平辟邪消腫明日悅肌

○溺鹹寒無毒行瘀血解勞蒸產婦要藥跌撲仙方
取積年溺垢卽名人中白。金汁卽名人中黃苦寒
無毒止陽毒發狂清痘瘡血熱解百毒傅疔瘡

龍骨齒甘平瀋精固腸止自汗生肌肉止崩淋齒瀉
涼鎮心安魂治小兒五驚十二癩

黃牛肉甘溫入肝經安中補脾益骨止渴。乳味甘
微寒潤腸胃解熱毒治反胃膈噎

熊膽味苦寒無毒殺虫治五疔止痢除黃疸去目障
虛家戒用

象皮鹹溫無毒金瘡要藥長肉神丹

鹿茸

初生之角

味甘鹹溫無毒健骨益氣除腰體疼痛止

崩漏虛勞者宜用○角茸生兩月成角補腎生精強

骨壯髓所云惟有班龍項上珠能補玉堂關下缺

羊肉甘溫入脾腎二經益氣血壯陽道開胃健力通

氣發瘡○肝苦寒補肝明目○膽點風淚眼去障翳

○脛骨入腎補骨○血解金銀丹石砒硫一切諸毒

○乳甘溫補肺腎虛治反胃消渴口瘡舌腫

狗肉 酸鹹性溫暖脾益胃補虛寒助陽事

虎骨味辛微熱追風健骨定痛辟邪治風痺拘攣驚

悸顛癇○肚治反胃○睛治小兒驚癇夜啼

獺肝甘溫有毒治鬼疰傳尸疫毒蠱災。爪能按逐
癆虫

猪水畜鹹寒心血爲心經藥之嚮導。尾血治痘瘡
倒靨。肺治肺虛咳嗽。肚入胃健脾。腎鹹冷治
腰痛耳聾。腸治腸風血痢膽汁苦入心勝熱潤燥
瀉肝胆之火。脂甘寒潤燥行水散風解毒。肉凡
肉皆補惟猪肉無補

鴨味甘鹹平滋陰氣化虛痰毛白烏嘴鳳頭者爲虛
癆聖藥

烏骨雞甘平益肝腎退熱補虛治虛癆消渴下痢禁

口帶下崩中

露蜂房甘温有毒拔疔瘡洗乳癰止風虫牙痛
牡蠣味鹹寒入腎經消煩滿化痰凝固精止汗

龜版鹹寒有毒入心腎二經補腎退骨蒸熱固腸止
痢兼療小兒顛不合

桑螵蛸味鹹平起陽事益精氣入腎經

石決明鹹平入肝經消障翳點赤膜

蟹鹹寒有小毒散惡血清熱結續筋接骨解漆瘡毒

合小兒顛門。爪墮胎

蕪蛇味鹹温有毒主癰瘰厲風治小兒急慢驚風

斑猫辛寒有毒破血結癥瘕利水道拔疔疽之根解
蠱毒輕粉毒不宜多用

蟾酥辛溫有毒療外科各症有奪命之功

蝦蟇辛溫有毒發瘡毒理疔積

水蛭味鹹苦平破惡血積聚療赤白丹腫癰毒入烏
鬚藥中能引藥力倒上至根

澤蘭葉苦甘微溫治金瘡癰腫治胎前產後百病通

九竅利關節兼治鼻血頭風目痛

紫葛根皮甘苦寒治癰腫惡瘡生肌散血

松花甘溫潤心肺益氣除風止血

貓肉甘酸溫無毒治癆疰鼠瘻蠱毒。頭骨甘溫治
鬼疰心腹痛殺虫治疔及痘瘡變赤。牙治痘瘡倒
靨

紅麴甘溫消食活血健脾燥胃治赤白痢

雄雞甘溫補虛溫中。頭居清高之分取其陽氣充
足故治中惡驚忤攻發痘瘡。子甘平鎮心益氣清
咽開音補血。純皮一名雞內金消水谷除熱止煩
紫背荷葉苦平止渴破血

膩粉

即水銀砂
一名輕粉

辛溫燥有毒通大腸轉小疔痺殺瘡

疥癬虫

油臙脂性熱潤燥治痘瘡燥裂

翻白草甘微苦平治吐血下血瘡疾癰瘡

田螺味大寒利溫清熱止渴點目熱赤痛搽痔瘡狐

臭

綿繭甘溫無毒治無頭癰腫療痘瘡疔蝕及下血崩

淋煨灰用

蕎麥甘平寒寔腸胃益氣治小兒丹毒赤腫熱瘡消

滯

芫荽子辛酸平消谷治蠱毒五痔塗小兒禿瘡發痘

疹

黃明膠甘平無毒治吐血衄血淋痢打撲傷損一切
癰疽腫毒止痛潤燥

白斂根苦平治癰疽散結氣血止痛除熱

芙蓉葉微辛平清肺涼血散熱解毒治癰疽惡瘡排
膿止痛

小粉甘涼補中益氣脈消一切癰腫湯火傷

鸛雀嘴治喉痺飛尸蛇虺咬小兒閃痺大腹痞滿○

卵水煮兒啖預解痘毒

水龍骨主治平療婦人崩中吐血治金瘡卽船底所

用油灰蘇皮陳年者佳

白蠟甘溫無毒生肌止血定痛補虛續筋接骨殺瘵
虫

黃蠟甘微溫治痢下膿血續絕傷金瘡

甜瓜子甘寒清肺潤腸和中止渴治腹內納聚破潰
膿血最爲腸胃脾內壅要藥

桑根滋治小兒口瘡白漫塗金刃傷大風瘡疥解百
毒氣

鷺膽苦寒解熱毒痔瘡

青魚膽苦寒色青入肝胆治目疾消赤腫障翳塗火
熱瘡

蒲扇治盜汗月水不斷

棟樹花治熱癩鋪席下殺蚤虱

地蜈蚣草苦寒無毒解諸毒大便不通汁塗癰腫

白頭翁苦溫無毒治溫瘧狂狴寒熱癥瘕止腹痛療
金瘡止痢兼主一切風氣

代赭石苦寒養血氣平血熱小兒慢驚金瘡長肉

鍋巴益胃除濕

五谷虫寒治熱病小兒瘡積疔瘡

鱸魚甘平無毒治腹內惡血去小虫補虛勞益脾胃

治腸風瀉血

石肝味酸無毒主身痒令人色美

補血甘平潤肺心更內惡血去小虫麻瘋殺益咽喉

正谷中藥節或酥小只散諸毒

鹽白

乃補百苦寒血燥平血糖水只對諸金瘡長肉

全效也融寒毒一

無毒山嵐瘴氣玉燕寒熱瘧疾九則暴熱

此物公等也然毒微諸毒大野不嚴皆金瘡

麻

痘疹傳心錄卷之十四終

